

fürvordern, oder mit vrteil verkunden wurden, wellen wir, daz dannoch vber die, dhein LanndtRichter oder Richter, wann die, vor der Achtte, von dem oftgerurten freyen LanndRichter zu Ranckwil, anstat vnsers lieben Vettern vnd Fürsten, oder seiner Erben abgeuordert werden, nicht Richten, noch vrteil ergeen lassen, Sonnder Sy alle, vnd yeden besonnder, zu Recht weise, in das gemelt frey Landgericht, daselbs man auch dem Cläger, ein fürderlich vnuerzogen Recht, nach ordnung vnd Herkomen des Lanndtgerichts, sol gestatten vnd ergeen lassen, Wann auch ergangen geschichtten oder verhandlung, mit clag, für das vilgenant Lanndtgericht, kómen oder gepracht werden, daz man alsdann denselben, so sölch geschicht, oder verhandlung beganggen haben sölten, oder darinne verdacht sind, sich zuverantwurtten, mit vrteil durch besigelt brieft, vnd des Gerichts gesworn Botten, solle vnd möge, zum Rechten verkunden, vnd wann das, mit vrteil beschicht, daz dann die antwurtter, mit dheiner Freyheit gezogen, Sonnder, dem Rechten solle an dem ende gestracks nachgegangen werden, Wir wellen auch, daz hinfür nymand, auf dhein Freyheit, oder Confirmation, von dem oftgemelten Lanndtgericht zu Ranckwil, auf yemands begern, von dem Rechten daselbs geweist werde, es sey dann solch Freyheit, eemalen vnd yetzo, von vns, in Keyserlicher wirde, oder hinfür, von Römischen Keysern oder Kunigen, vnsern Nachkomen am Reiche, Confirmiret vnd bestétiget vngewerlich. Doch vns vnd dem Reiche, an vnser oberkeit, gewaltsam vnd gerechtikeit, vnuergriffenlich vnd vnschédlich. Vnd gepietten darumb, allen vnd yeglichen Fürsten, geistlichen vnd werntlichen, Grauen Freyen, Herren, Rittern Knechten, Hauptluten, LanndtRichtern, Richtern, Burgermeistern, Retten, Amptluten, Burgern vnd Gemeinden, vnd sust allen andern, vnsern vnd des Reichs vndertanen vnd getrewen, von egemelter Römischer Keyserlicher macht, ernstlich vnd vessticlich mit disem brief; daz Sy den vorgebant Hertzog Sigmunden, vnd sein Erben, an den egemelten vnsern gnaden vnd Freyheiten, nicht hindern noch Irren, in dhein weyse, Sonnder Sy der also gerulich prauchen vnd geniessen lassen, Als lieb einem yeglichen sey, vnser vnd des Reichs swere vngnade zu uermeiden, Vnd darzu ein Pene, némlich zwaintzig marck lötiges goldes, die